

– Իսկապես շատ սովորական մի դեպք, որի նմանը համարեա ամեն օր, ամեն գիշեր պատահում է, – պատասխանեց վարպետը, նստելով Ասլանի մօտ:

– Այգիներից միրգ էին գողանում: Թուրք կամ քուրդ գիւղացիները, երբ քաղաքը բան են բերում վաճառելու, գիշերը, դեպի իրանց գիւղերը վերադառնալու ժամանակ, սովորութիւն ունեն կողոպտելու հայերի այգիները: Դա պետք է մի առանձին բարութիւն համարել, երբ բաւականանում են միայն պտուղներ գողանալով, բայց այդ անիրաւները կտրատում են եւ ծառերը: Տեսնում ես, ցերեկով լուռ ու մուկ անցնում են այգիների մօտից, նայում են ծառերի վրայ, նկատում են, որ այսինչ նորահաս կեռասենին, այսինչ գեղեցիկ տանձենին կարող է ծառայել իրանց կտրած գութանը կամ արօրը նորոգելու, իսկոյն նշան են դնում, եւ, գիշերը մտնելով այգին, կտրում են եւ տանում: Տիրոջ տարիներով խնամած ու հասցրած ծառը ոչնչանում է, այգին այլանդակում է: Իսկ որքա՞ն ցաւ է պատճառում այդ դժբախտութիւնը խեղճ այգեգործին: Ես տեսել եմ ընտանիքներ, որոնք օրերով նստած իրանց սիրելի ծառերի կտրած բների մօտ, լաց են եղել, սուգ են կատարել, որպէս սպանուած որդու գերեզմանի վրայ:

Պատահած անցքը, որքան վարպետի համար վրդովեցուցիչ էր, նոյնքան Ասլանը սառն կերպով վերաբերոեցաւ: Այդ երկրում կարգից դուրս բան չէր, որ մէկը աշխատասեր է, ծառեր է տնկում, այգի է մշակամ, պտուղներ է հասցնում, իսկ միւսը ծոյլ է, անկիրթ է. սովորել է միայն բռնութեամբ յափշտակել առաջինի աշխատութեան արդիւնքը:

– Փոխանակ իրանք լաց լինելու, լաւ չէ՞ր լինի, որ կտրողներին լացացնէին, – ընդհատեց Ալանը վարպետի խօսքը:

– Լաւ կը լիներ, – պատասխանեց վարպետը խորին կերպով հոգոց հանելով: – Բայց այդ դժոար է... շատ դժոար է... նրանց կողմումն է վայրենի ուժը... նրանց կողմումն է անպատիժ բարբարոսութիւնը... Մեր ձեռքերը կապել են, իսկ նրանցը՝ բաց թողել... Մեր ձեռքում մի փայտի կտոր անգամ չեն թողել, իսկ նրանք սուր են կրում... Մենք զրկուած ենք անձնապաշտպանութեան ամեն միջոցներից: Եթէ այգետերը մի ամենափոքր ընդդիմադրութիւն ցոյց տայ եւ թոյլ չտայ, որ իր ծառը կտրեն, հաւատացած եղէք, որ միւս գիշերը կը մտնեն նրա տունը եւ նրա պարանոցը կը կտրեն: Եւ այս տեսակ չարագործները կը մնան անպատիժ, որովհետեւ այստեղ հայի գլուխը մի սոխի գլխի չափ արժէք չունի:

– Եթէ ամեն հայ իր սենեակում այդպէս զենքեր ունենար, էլ նրա գլուխը չէին կտրի սոխի նման, – նկատեց Ասլանը: